

Na osnovu člana 5. Pravilnika o poticaju zapošljavanja mladih sa područja Općine Centar Sarajevo, broj 10-49-242/18 od 12.02.2018, Služba za privredu i lokalno ekonomski razvoj Općine Centar Sarajevo objavljuje

JAVNI POZIV

Za podnošenje zahtjeva za subvenciju poslodavcima o poticaju zapošljavanja mladih sa područja Općine Centar Sarajevo

I Obavezna dokumentacija za subvenciju poslodavcima

1. Dokaz da ima sjedište firme na području Općine Centar Sarajevo (**rješenje o registraciji**);
2. Dokaz da isplaćuje radnicima plaće u skladu sa važećim propisima uključujući dospjele poreze i doprinose za obavezna osiguranja (**uvjerenje nadležne institucije**);
3. Dokaz da do dana objave javnog poziva nije smanjio broj zaposlenih osoba sa liste osiguranih osoba poslodavca, osim u opravdanim slučajevima (otkaz na vlastiti zahtjev radnika, penzionisanje, nesposobnost za rad i sl.) **/izjava ovjerena od nadležnog organa/**;
4. Dokaz da nije pod stečajem, niti je predmet stečajnog postupka, da nije predmet postupka likvidacije, odnosno da nije u postupku obustavljanja poslovne djelatnosti (**izjava ovjerena od nadležnog organa**);
5. Dokaz da je izmirio dospjele obaveze u vezi sa plaćanjem direktnih i indirektnih poreza (**uvjerenje nadležne institucije**),
6. Dokaz da je nezaposlena osoba prijavljena na nadležnoj službi za zapošljavanje kao nezaposlena osoba i da ima prebivalište na području Općine Centar Sarajevo najmanje tri (3) godine (**dokazi: uvjerenje sa Biroa i uvjerenje o kretanju**).

Dokumentacija iz tački 2. do 6. ne mogu biti stariji od 15 dana od dana objave Javnog poziva, a kopija rješenja o registraciji firme iz tačke 1. mora biti ovjerena od strane nadležnog organa.

Pravo na subvenciju ne mogu ostvariti oni poslodavci čije djelatnosti se odnose na djelatnosti ugostiteljstva, proizvodnje oružja i vojne opreme, proizvodnje duhanskih proizvoda i alkoholnih pića, primarne poljoprivredne proizvodnje, otvaranja kasina i drugih igara na sreću.

Poslodavac koji bude ispunjavao uslove za potpisivanje ugovora obavezan je da dostavi dokument kojim će potvrditi vjerodostojnost date izjave iz tačke 4. i ovjerenu kopiju zaključenoga ugovora o radu u skladu sa Zakonom o radu sa nezaposlenom osobom sa područja Općine Centar Sarajevo starosti do 35 godina koja je prijavljena nadležnoj službi za zapošljavanje i koja ima prebivalište na području općine Centar

Sarajevo najmanje tri godine sa prijavom na obavezno osiguranje (obrazac prijava/odjava JS 3100).

II Iznos subvencije

Poslodavac koji zaposli nezaposlenu osobu, sa visokom stručnom spremom, na period od 12 mjeseci, ima pravo na refundiranje troškova propisanih doprinosa iz plaće i na plaću, obaveze za porez i doprinose u ukupnom iznosu od 750,00 KM.

Poslodavac koji zaposli nezaposlenu osobu, sa srednjom stručnom spremom, na period od 6 mjeseci, ima pravo na refundiranje troškova propisanih doprinosa iz plaće i na plaću obaveze za porez i doprinose u ukupnom iznosu od 490,00 KM.

III Obaveza trajanja radnog odnosa

Radni odnos zaposlenika čije se zapošljavanje subvencionira traje koliko i period za koji se osigurava subvencija i još najmanje isti period nakon isteka tog roka.

IV Ograničenje u pogledu korištenja prava

Poslodavac koji koristi sredstva poticaja u smislu ovog Pravilnika, ne može za istu osobu koristiti mjere aktivne politike u zapošljavanju koje se provode prema posebnom propisu, niti po toj osnovi ostvariti druga prava.

V Prijava na Javni poziv

Prijave na Javni poziv za subvencioniranje poslodavaca za slučaj zapošljavanja mladih nezaposlenih osoba sa područja Općine Centar Sarajevo podnosi se Službi za privredu i lokalni ekonomski razvoj putem protokola Općine koja sadrži podatke o firmi i osobama koje žele zaposliti, sa obaveznom dokumentacijom.

Prijava sa neophodnom dokumentacijom se dostavlja u zatvorenoj koverti na kojoj mora biti naznačeno:

- prijava na Javni poziv,
- kome se dostavlja,
- naziv poslodavca,
- naznaka „ne otvaraj“,
- nije dopušteno dostavljanje direktno u Službu.

VI Obaveze poslodavca

Poslodavac koji koristi subvenciju u skladu sa ovim Pravilnikom, za vrijeme trajanja perioda za koji prima subvenciju, ne može smanjiti broj zaposlenih osoba, u odnosu na broj zaposlenih koji je imao na dan objave Javnog poziva, osim iz razloga više sile (elementarne nepogode, požar, izmjene propisa koji direktno utiču na poslovanje poslodavca), penzionisanja ili nesposobnosti za rad.

Ukoliko u periodu trajanja radnog odnosa zaposlenika čije se zapošljavanje subvencionira nastupe okolnosti usljed kojih poslodavac ne ispunjava neki od

propisanih uslova iz člana 3. Pravilnika, isti gubi pravo na subvenciju te je dužan u roku od 30 dana od dana prestanka ispunjavanja uslova obračunati i uplatiti Općini Centar Sarajevo iznos u visini ukupno iskorištenih sredstava subvencije.

Ako uprava za inspekcijske poslove ili porezna uprava utvrde da je došlo do smanjenja broja zaposlenih i da poslodavac nije postupio u skladu sa članom 7. Pravilnika, poslodavac je dužan uplatiti, pored gore navedenog novčanog iznosa i pripadajuću zakonsku kamatu u skladu sa važećim propisima.

Povrat isplaćenih sredstava subvencije u slučaju neispunjavanja uslova od strane poslodavca garantira se bjanko potpisanom i ovjerenom mjenicom sa naznakom „bez protesta“ koju je poslodavac dužan dostaviti zajedno sa mjeničnom izjavom – ovlaštenjem za popunjavanje mjenice i bjanko potpisanim i ovjerenim nalogom za plaćanje, prilikom zaključivanja ugovora o subvencioniranju.

Poslodavac koji novom zaposleniku isplaćuje veći iznos propisanih doprinosa na/iz plaće, obaveze za porez i doprinose, dužan je obračunavati i uplaćivati razliku iznosa doprinosa u odnosu na iznos koji se subvencionira.

U slučaju raskida ugovora o radu sa sufinansiranom osobom, tokom perioda za koji se osigurava subvencija, poslodavac je dužan odmah o tome obavijestiti davaoca subvencije Općinu Centar Sarajevo te mora u roku od 15 dana od dana nastanka te okolnosti zaključiti ugovor o radu sa drugom nezaposlenom osobom koja ispunjava uvjete navedene u članu 2. ovog Pravilnika, na preostali period ugovorne obaveze, kao i prijavni obrazac JS 3100.

Poslodavac je u obavezi da najdalje pet dana od isplate plaće, nadležnoj službi dostavi specifikacije plaće i propisanih doprinosa ovjerenih u poreskoj upravi, ovjerene i potpisane platne liste osobe za koju se osigurava subvencija, uplatnice za pojedinačne isplate plaća, a u slučaju zbirne uplate plaća kopije izvoda banaka iz kojih je vidljiva isplata pojedinačne plaće za sufinansiranu osobu.

Poslodavac je fizičko ili pravno lice iz privatnog sektora koje može koristiti sufinansiranje pri zapošljavanju nezaposlene osobe sa područja općine Centar i čije sjedište je na području Općine Centar Sarajevo.

Javni poziv ostaje otvoren do utroška raspoloživih sredstava, tj. do potpisivanja ugovora u vrijednosti raspoloživih sredstava.

Po redosljedu prijava poslodavaca nadležna Služba odmah pristupa otvaranju dostavljene dokumentacije pristigle po Javnom pozivu, te pregleda validnost dokumentacije i ispunjavanje uslova utvrđenih Pravilnikom, nakon čega Općinski načelnik sa poslodavcem zaključuje ugovor o subvencioniranju.

Nadzor nad ispunjavanjem uslova za subvenciju propisanih Pravilnikom za vrijeme korištenja subvencije, vršit će Općinski načelnik putem nadležne službe u saradnji sa Poreznom upravom na mjesečnoj osnovi.